



REPUBLIKA E SHQIPËRISË
MINISTRIA E BRENDSHME
AGJENCIA E MBIKËQYRJES POLICORE

Nr. 02/33 Prot.

Tiranë më, 17/01/2024

V E N D I M

Nr. 01, datë 17.01.2024

Trupa e Vlerësimit pranë Agjencisë së Mbikëqyrjes Policore, e përbërë nga:

Bora Vrenjo Kryesuese
Henri Naqellari Relator
Loreta Hanxhari Anëtare

në datën 17.01.2024, në orën 09:00, në ambientet e Agjencisë së Mbikëqyrjes Policore, mori në shqyrtim mbi bazë dokumentesh, çështjen që i përket:

SUBJEKTI I VLERËSIMIT:

Znj. Eljona Pjetër Preçi me funksion aktual: Specialist, në Sektorin për Hetimin e Trafikeve, në Drejtorinë për Hetimin e Narkotikëve, në Departamentin e Policisë Kriminale, në Drejtorinë e Përgjithshme të Policisë së Shtetit.

OBJEKTI:

Vlerësimi kalimtar i subjektit të vlerësimit.

BAZA LIGJORE:

Ligji nr. 12/2018 “Për Vlerësimin Kalimtar dhe Periodik të Punonjësve të Policisë së Shtetit, Gardës së Republikës, Shërbimit për Çështjet e Brendshme dhe Ankesat në Ministrinë e Brendshme”, i ndryshuar, (këtu e në vijim Ligji nr. 12/2018, i ndryshuar).

Ligji nr. 44/2015 “Kodi i Procedurave Administrative të Republikës së Shqipërisë”.

Ligji nr. 49/2012 “Për Organizimin dhe Funkionimin e Gjykatave Administrative dhe Gjykimin e Mosmarrëveshjeve Administrative”, i ndryshuar.

TRUPA E VLERËSIMIT TË AGJENCISË SË MBIKËQYRJES POLICORE,

pasi dëgjoji dhe vlerësoi shpjegimet dhe argumentimin ligjor të relatorit së çështjes, Z. Henri Naqellari, pasi shqyrtoi dhe analizoi çështjen në tërësi, bazuar në Ligjin nr. 12/2018, i ndryshuar,

V Ë R E N:

I. RRETHANAT E ÇËSHTJES

1. Agjencia e Mbikëqyrjes Policore është institucioni që kryen procesin e vlerësimit kalimtar të punonjësve të Policisë së Shtetit, Gardës së Republikës dhe Agjencisë së Mbikëqyrjes Policore, bazuar në Ligjin nr.12/2018, i ndryshuar.
2. Në zbatim të nenit 6, të Ligjit nr. 12/2018 i ndryshuar, Agjencia e Mbikëqyrjes Policore vlerëson punonjësit në pozicionet e mëposhtme:
 - a) *Drejtor dhe Zëvendësdrejtor i Përgjithshëm, Drejtor Departamenti, Drejtor i Drejtorisë Qendrore, Drejtor në strukturat e veçanta, Drejtor e Zëvendësdrejtor vendor, Drejtor në Drejtorinë e Kufirit dhe Migracionit, Shef Komisarati, Shef Sektori në nivel qendror e vendor, që mbulon fushën e krimit të organizuar, krimit ekonomik/financiar dhe policisë rrugore në Policinë e Shtetit;*
 - b) *Drejtor dhe Zëvendësdrejtor i Përgjithshëm, Drejtor Drejtorie dhe Shef Njësie në Gardën e Republikës;*
 - c) *Drejtor dhe Zëvendësdrejtor i Përgjithshëm, Drejtor Drejtorie, Shef Sektori në nivel qendror dhe vendor në Agjencinë e Mbikëqyrjes Policore;*
 - d) *punonjësit që do të emërohen në strukturën e vlerësimit kalimtar/periodik në Agjencinë e Mbikëqyrjes Policore;*
 - e) *çdo punonjës që emërohet në pozicionet e përcaktuara në shkronjat “a”, “b”, “c” dhe “d”.*
3. Sipas përcaktimeve të nenit 6, të Ligjit nr. 12/2018, i ndryshuar, Znj. Eljona Preçi ka qenë subjekt i vlerësimit kalimtar nga Trupat e Vlerësimit të Agjencisë së Mbikëqyrjes Policore, për shkak të funksionit të saj si Drejtor, në Drejtorinë e Inspektimit dhe Ankesave, pranë Agjencisë së Mbikëqyrjes Policore.
4. Subjekti i vlerësimit, Znj. Eljona Preçi, i'u nënshtrua procedurave të vlerësimit, duke u shortuar në shortin e zhvilluar në datën 05.04.2023, nga Trupat e Vlerësimit, në përputhje me Udhëzimin e Ministrit të Brendshëm nr.7, datë 17.01.2023 “Për procedurat e hedhjes së shortit”. Sipas shortit të zhvilluar, Trupa e Vlerësimit përbëhet nga Znj. Bora Vrenjo (Kryesuese), Z. Henri Naqellari (Relator) dhe Znj. Loreta Hanxhari (Anëtare).
5. Subjekti i vlerësimit, Znj. Eljona Preçi, ka dorëzuar deklaratën e pasurisë, deklaratën e kontrollit të figurës dhe formularin e vlerësimit të aftësive profesionale, sipas përcaktimeve

të nenit 32, pika 2, nenit 36, pika 1, dhe nenit 44, pika 1, të Ligjit nr.12/2018, i ndryshuar, të cilat janë marrë në dorëzim nga relatori i çështjes.

6. Në zbatim të legjislacionit në fuqi mbi parandalimin e konfliktit të interesit, me Vendimin nr. 1, datë 18.04.2023, u deklarua mospasja e konfliktit të interesit nga anëtarët e Trupës së Vlerësimit sipas nenit 27, pika 1, të Ligjit nr.12/2018, i ndryshuar dhe neneve 30 dhe 31, të Kodit të Procedurave Administrative.
7. Trupa e Vlerësimit në përputhje me Ligjin nr.12/2018, i ndryshuar, si edhe në bazë të Rregullores nr.197, datë 23.02.2023 “Për hapat procedural të unifikuar”, me Vendimin nr. 1, datë 18.04.2023, vendosi fillimin e hetimit kryesisht për subjektin e vlerësimit Znj. Eljona Preçi.
8. Relatori i çështjes, nëpërmjet komunikimit elektronik zyrtar datë 18.04.2023, njoftoi subjektin e vlerësimit për fillimin e procesit të vlerësimit kalimtar, duke i bërë me dije përbërjen e Trupës së Vlerësimit dhe duke i kërkuar subjektit të vlerësimit të deklarojë nëse është në kushtet e konfliktit të interesit me anëtarët e Trupës së Vlerësimit.
9. Subjekti i vlerësimit ka dorëzuar deklaratën për konfliktin e interesit në Agjencinë e Mbikëqyrjes Policore në datën 20.04.2023, duke u shprehur se nuk është në kushtet e konfliktit të interesit me asnjë nga anëtarët e Trupës së Vlerësimit.
10. Relatori i çështjes në përmbushje të detyrimeve ligjore të përcaktuara në pikën 3, të nenit 25, të Ligjit nr. 12/2018, i ndryshuar, dhe sipas:
 - nenit 7, pika 1, të Rregullores nr. 197, datë 23.02.2023 “Për hapat proceduralë të unifikuar”, nenit 4 të Marrëveshjes së Bashkëpunimit ndërmjet Agjencisë së Mbikëqyrjes Policore dhe Inspektoratit të Lartë të Deklarimit dhe Kontrollit të Pasurisë dhe Konfliktit të Interesit (këtu e në vijim ILDKPKI), ka dërguar me shkresën nr.*** prot., datë 19.04.2023, pranë ILDKPKI-së, formularin e deklarimit të pasurisë për vlerësimin kalimtar të dorëzuar nga subjekti i vlerësimit.
 - nenit 7, pika 4, të Rregullores nr. 197, datë 23.02.2023 “Për hapat proceduralë të unifikuar”, ka dërguar me shkresën nr.*** prot., datë 19.04.2023, pranë Agjencisë së Mbikëqyrjes Policore, deklaratën e kontrollit të figurës për vlerësimin kalimtar të dorëzuar nga subjekti i vlerësimit.
 - nenit 7, pika 7, të Rregullores nr. 197, datë 23.02.2023 “Për hapat proceduralë të unifikuar”, ka dërguar me shkresën nr.*** prot., datë 19.04.2023, pranë Agjencisë së Mbikëqyrjes Policore, formularin e aftësive profesionale për vlerësimin kalimtar të dorëzuar nga subjekti i vlerësimit.
11. ILDKPKI, me shkresë nr. ***, prot., datë 31.07.2023, dërgoi raportin e hollësishëm dhe të arsyetuar pas procedurës së kontrollit për vlerësimin e pasurisë së subjektit të vlerësimit Znj. Eljona Preçi, në përputhje me nenin 34, të Ligjit nr. 12/2018, i ndryshuar.

12. Drejtoria e Analizës dhe Sigurisë së Personelit pranë Agjencisë së Mbikëqyrjes Policore, me shkresë nr. ***, prot., datë 31.07.2023, dërgoi raportin e kontrollit të figurës për subjektin e vlerësimit Eljona Preçi, në përputhje me nenin 42, të Ligjit nr. 12/2018, i ndryshuar.
13. Drejtoria e Financës dhe Shërbimeve Mbështetëse pranë Agjencisë së Mbikëqyrjes Policore, me shkresë nr. ***, prot., datë 21.07.2023, dërgoi raportin e hollësishëm dhe të arsyetuar për subjektin e vlerësimit Znj. Eljona Preçi, në përputhje me nenin 46, të Ligjit nr. 12/2018, i ndryshuar.
14. Në vijim relatori i çështjes, bazuar në nenet 34, 42 dhe 46 të Ligjit nr. 12/2018, i ndryshuar, ka administruar raportet e hartuara nga institucionet përgjegjëse, duke kryer një hetim të plotë dhe të gjithanshëm mbi të tria kriteret: vlerësimi i pasurisë, kontrolli i figurës dhe vlerësimi i aftësive profesionale.
15. Hetimi administrativ përfshiu edhe personat e lidhur apo persona të tjerë të lidhur, në kuptim të nenit 3, pika 11, neni 5, i Ligjit nr. 9367, datë 07.04.2005 “Për Parandalimin e Konfliktit të Interesave në Ushtrimin e Funksioneve Publike”, si dhe nenit 34, pika 1, e Ligjit nr.12/2018, i ndryshuar.
16. Drejtoria e Financës dhe Shërbimeve Mbështetëse, pranë Agjencisë së Mbikëqyrjes Policore, me shkresë nr. ***, prot., datë 13.12.2023, ka njoftuar Trupën e Vlerësimit, se subjekti i vlerësimit Znj. Eljona Preçi, është liruar nga detyra me Urdhër nr. 864, datë 11.12.2023, të Drejtorit të Përgjithshëm, me motivacionin “*Me kërkesën e saj*”.
17. Drejtoria e Financës dhe Shërbimeve Mbështetëse, pranë Agjencisë së Mbikëqyrjes Policore, ka vënë në dispozicion të Trupës së Vlerësimit dokumentacionin si më poshtë:
 - Urdhër nr. 864, datë 11.12.2023, “*Për lirimin nga detyra të një punonjësi të AMP-së*”, me anë të të cilit Znj. Eljona Preçi, është liruar nga detyra e Drejtorit të Drejtorisë së Inspektimit dhe Ankesave, në Drejtorinë e Përgjithshme të Agjencisë së Mbikëqyrjes Policore.
18. Drejtoria e Përgjithshme e Policisë së Shtetit, ka njoftuar Trupën e Vlerësimit, se Znj. Eljona Preçi është rikthyer në strukturat e Policisë së Shtetit dhe është emëruar me detyrë Specialist, në Sektorin për Hetimin e Trafikeve, në Drejtorinë për Hetimin e Narkotikëve, në Departamentin e Policisë Kriminale, pranë Drejtorisë së Përgjithshme të Policisë së Shtetit.
19. Trupa e Vlerësimit ka administruar dokumentacionin si më poshtë:
 - Urdhër nr. 206/3, datë 12.12.2023, “*Për rikthimin në Policinë e Shtetit dhe emërimin në detyrë të Znj. Eljona Pjetër Preçi*”.
20. Trupa e Vlerësimit është vënë në dijeni të liritimit nga detyra që subjekti i vlerësimit Znj. Eljona Preçi, ushtronte pranë Agjencisë së Mbikëqyrjes Policore, dhe rikthimit në strukturat e Policisë së Shtetit, duke u emëruar në një pozicion që nuk parashikohet në nenin 6, të Ligjit nr.12/2018, i ndryshuar, në kushtet kur nuk kishte marrë vendim përfundimtar për përfundimin e hetimit administrativ.

II. ARSYETIMI LIGJOR I TRUPËS SË VLERËSIMIT

21. Trupa e Vlerësimit, pasi u njoh me rrethanat e çështjes, administroi dokumentacionin si vijon:

- Shkresë nr. ***, prot., datë 13.12.2023, nga Drejtoria e Financës dhe Shërbimeve Mbështetëse, pranë Agjencisë së Mbikëqyrjes Policore.
- Urdhër nr. 864, datë 11.12.2023, “Për lirimin nga detyra të një punonjësi të AMP-së”, të Drejtorit të Përgjithshëm të Agjencisë së Mbikëqyrjes Policore.
- Urdhër nr. 206/3 datë 12.12.2023, “Për rikthimin në Policinë e Shtetit dhe emërimin në detyrë të Znj. Eljona Pjetër Preçi”, të Drejtorit të Përgjithshëm të Policisë së Shtetit.

22. Nga verifikimi i akteve në terësi, Trupa e Vlerësimit konstaton se, ndodhemi në kushtet e dorëheqjes nga detyra të subjektit të vlerësimit, si Drejtor, në Drejtorinë e Inspektimit dhe Ankesave, pranë Agjencisë së Mbikëqyrjes Policore, ku akti i liritimit është formalizuar gjatë fazës së hetimit administrativ.

23. Gjatë kësaj faze, subjekti i vlerësimit është rikthyer në Policinë e Shtetit dhe është emëruar në detyrën Specialist, në Sektorin për Hetimin e Trafikeve, në Drejtorinë për Hetimin e Narkotikëve, në Departamentin e Policisë Kriminale, pranë Drejtorisë së Përgjithshme të Policisë së Shtetit, me Urdhër të Drejtorit të Përgjithshëm të Policisë Shtetit, nr. 206/3, datë 12.12.2023.

24. Për këtë arsye Znj. Eljona Preçi:

- *Nuk është subjekt i vlerësimit kalimtar, për shkak të dorëheqjes nga detyra dhe pozicionit të saj të punës jashtë fushës së ushtrimit të veprimtarisë së institucionit të vlerësimit kalimtar (Agjencisë së Mbikëqyrjes Policore), pozicion që nuk përcaktohet në pikën 1, të nenit 6, të Ligjit nr. 12/2018, i ndryshuar.*

25. Në këto kushte, Trupa e Vlerësimit deklaron të përfunduar çështjen e hetimit administrativ të nisur ndaj subjektit të vlerësimit, pa një vendim përfundimtar për shkak se interesi, qëllimi dhe objekti për të cilin ka nisur procedura, janë bërë ligjërisht të pamundur, duke konstatuar se ndodhemi në kushtet e zbatimit të nenit 95, të Kodit të Procedurave Administrative të Republikës së Shqipërisë.

PËR KËTO ARSYE:

Trupa e Vlerësimit pranë Agjencisë së Mbikëqyrjes Policore, mbështetur në Ligjin nr. 12/2018, i ndryshuar, si dhe në nenin 95, të Kodit të Procedurave Administrative të Republikës së Shqipërisë;

V E N D O S I:

1. Ndërprerjen e procesit të vlerësimit kalimtar të subjektit të vlerësimit **Eljona Pjetër Preçi**, me funksion Specialist, në Sektorin për Hetimin e Trafikeve, në Drejtorinë për Hetimin e Narkotikëve, në Departamentin e Policisë Kriminale, pranë Drejtorisë së Përgjithshme të Policisë së Shtetit, pa një vendim përfundimtar.

2. Ky vendim publikohet në faqen zyrtare të Agjencisë së Mbikëqyrjes Policore, në përputhje me pikën 8, të nenit 56, të Ligjit nr. 12/2018, i ndryshuar.
3. Kundër këtij vendimi lejohet ankim brenda 45 ditëve nga data e njoftimit, në Gjykatën Administrative të Shkallës së Parë, Tiranë.

Ky vendim u shpall sot më datë 17.01.2024, në Tiranë.

TRUPA E VLERËSIMIT

Bora VRENJO

Kryesuese

Henri NAQELLARI

Relator

Loreta HANXHARI

Anëtare